



UNIVERSITÄTS-
BIBLIOTHEK
PADERBORN

Universitätsbibliothek Paderborn

Joannis Commirii E Societate Jesu Carminum Libri Tres

Commire, Jean

Lutetiæ Parisiorum, 1678

De Transfugio Cordis. Ad amicum amica expostulatio.

urn:nbn:de:hbz:466:1-14818

At quæ dente putri saliens micat unda , colorem
Fellis habet , potu & bilem succendit acerbo.
Proritatque animos , letumque in vulnere linquit.

Lyricum carmen.

Amphion fidibus mulcens delphina canoris
Inde mari vehitur. Glomerant se vitrea circum
Numina Tritones , pendentque canentis ab ore
Attoniti. Patulis geminos de naribus efflat
Interea piscis fontes , pulsatque vicissim
Humenti citharam plestro. Bibit impigra vatum
Gens latices , & fatidico se proluit haustu :
Tum vero heroum superis exæquat honores,

D E

TRANSFUGIO CORDIS.

Ad amicum amica expostulatio.

IS T A quidem vis est. Quid enim committere tantum
Imprudens in te potui , dilecte Menalca ,
Ut mihi cor furto vulsum radicibus imis
Surriperes ? hæc Musarum pro munere solvis ?

Debueram certe , si mens non læva fuisset ,
Præsentire dolos , & quæ me damna manebant :
Cum primùm vultusque nives , capitisque verendum
Canitiem , & signis qui plurimus extat in illis
Candorem perspexi animi , moresque serenos ,
Et come ingenium , & juvenilem penè senectam ,
Doctrinæque capax peccus , Phœboque sacratum
Et Musis , vegetamque effoeto in corpore mentem.

Ex illo namque insidias & dulcia tendens
Vincula , cœpisti cordis , blandissime , fluxam
Sollicitare fidem , nostroque avertere sensim

Obsequio , atque tuas me dissimulante vocare
Sub leges mirâ illecebra ac dulcedine victum.

Ex illo tua perpetuo circumvolat ipsum
Effigies : te nocte vigil , te luce renata
Cogitat , in te uno cura inclinante moratur.
Nec satis hoc illi est , ni tota à sede revulsum
Ad te exire sui pennâ festinet amoris.

Exeat , inque sinu , quam non reperire priori
Sub domino potuit , capiat felice quietem.

Sed ne te lateat natura , novique clientis
Conditio ac mores ; paucis adverte , docebo.
Vividus est olli flammæ vigor , ignea virtus ,
Formaque nativo referens in acumine flammam:
Irrequies motus , tremuloque simillimus igni :
Ore vomit flamas , sunt huic quoque pabula flammæ:
Insontes flammæ , quas non Venus improba telis
Succedit , fallaxve auri nitor , aut mala vulgi
Gloria ; sed sincerus amor , generosaque honesti
Ambitio , & gaudens luxum nescire voluptas.
Illos causa eadem nutrit , quæ suscitat ignes.
Atque ubi materiam castis ardoribus aptam
Invenere , huic æternis amplexibus hærent ,
Constantique fide ; quam nec longæva vetustas ,
Annorumque vices , nec toto dissipata mundo
Corpora dissolvant , nec iniquæ injuria sortis ,
Aut gelidæ noctis frigus , cineresque sepulcri ,
Feralesque umbræ , tristisque oblivia Lethes.
His tibi cor nexum illecebris , dilecte Menalca ,
Nulla sui sentire potest dispendia amoris :
Æternæ existent æterno ex fomite flammæ.

Nec tamen una meum commendat gloria pectus ,
Quod sit ab alterius castis penetrabile telis :

Q ij

Urit amore sui multos quoque , nec genus illos
 Indecores , quos h̄ic longus meminisse viritum
 Sit labor. Ex uno reliquos , tantum instar in uno ēst ,
 Conjicias. Deus , ipse Deus , cui flore micantes
 Terra sinus pingit nequicquam , optatque videri
 Luminibus formosa suis ; cui sidera crines
 Auratis comunt radiis ; quem Luna fatetur
 Curarum auctorem grato pallore suarum ;
 Cujus ab igne calet Phœbus ; quem cœrula Tethis
 Ardet habere procum , & votis certantibus ambit
 Incassum : nostri jampridem flagrat amore
 Pectoris. Huic & delicias , & gaudia cœli ,
 Gaudia mortales longe exuperantia sensus ,
 Interdum partitur , & ubere proluuit haustu ,
 Alliciens , hacque invitans dulcedine tardum.
 Sæpe etiam subiit ingens penetralibus hospes ,
 Accubuitque sinu parvo , visusque quietem
 Hujus in amplexu & felices quærere somnos :
 Aut sacra ipse suos expressit cuspidi vultus ,
 Insertumque notis nomēn pretiosus amator
 Exsculpit , tacitisque loquentia signa figuris .
 Nec mora nec modus est : donec cor denique victimum
 Exæquet curas , casto & respōndeat igni .

Gloria , crede mihi , magna ēst , dilecte Menalca ,
 Rivalem meruisse Deum ; quodque omnibus ipse
 Ambiat officiis , ultro te tollere munus .

At quoniam ut soles geminos , sic bina recusat
 Corda pati natura ; tuum donare vicissim
 Te decet. Unus enim merces æqualis amoris
 Est amor , & solo constat bene pectore pectus .

Quām gratum mihi pignus erit ! quæ cura tuendi
 Tantum depositum non sollicitabit amantem ?

Quos illi cultus & religionis honores
 Non referam, gratus Musis Phœboque sacerdos?
 Victima erunt lacrymæ, & dulci suspiria questu
 In numerum sociata, & gaudia mista dolori.
 Ipse comam lauri redimitus fronde nitentem,
 Concipiamque preces & non improspera vota:
 Quæ, si nec surdum est, nec duro durius ære,
 Audiet, eque sinu nolet discedere nostro.

IN NATALEM S. JOANNIS BAPTISTÆ,

ELIAS FATIDICUS.

AD ILL. V.

PETRUM DANIELEM HUETIUM.

VO^s mihi nunc sacrum natalem, ortusque beatos
 Zacharidæ pueri, quo tota exultat Idume,
 Cui Libani & celsæ salierunt Thaboris arcæ,
 In numerumque suas Jordanes impulit undas;
 Dicite cœlicolæ. Nam primi nomen, & ingens
 Præsciftis longe decus; ignaroque parenti
 Promissæ fato prolis monstrasti honorem.
 Tuque adeo Isacidum jam felicissima matrum
 E latebris erumpe tuis. Tibi dedecus alvi
 Ista dies, sterilisque senectæ opprobria demit:
 Atque moræ tanto pensat fastidia partu.
 Nec vero tibi consuetos Lucina dolores
 Attulit enixi in primo: nec dulce parentis
 Quæstum multo tribuit discrimine nomen.
 Sed facili castus solvit se pondere venter
 Sponte sua. Qualis maturus ab arbore fœtus

Q iij